

Sinerissami tarnimikkut napparsimasut sullinneqarnerisa pitsaassusaata ukiut tamaasa nalilersuiffiqartarnissaa siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Naliliisussat tassaassapput atuisut sulisullu ulluinnarni pineqartunik passussisartut.

(Inatsisartunut ilaasortaq Agathe Fontain, Inuit Ataqatigiit)

Akissuteqaat

(Peqqissutsimut Attaveqarnermullu Naalakkersuisoq Steen Lyng)

Siullermeerneqarnera

Inatsisartunut ilaasortap matuminnga siunnersuuteqarsimanera pillugu assut qutsavigaara.

Innuttaasup qitiutinneqarnissaa aamma peqqinnissaqarfiup sullissinerata toqqissisimanartuunissaata qularnaarneqarnissaat Naalakkersuisut sulissutigaa.

Naalakkersuisut sulissutigaa, tarnimikkut napparsimasunut atugassarititaasut pitsaanerulernisaat suliniutit aallartinneqareersut ingerlatseqqinniarlugit minnerunngitsumillu, nappaatiminnik sakkortuumik eqqugaasut, nunap immikkoortuini najukkani tarnimikkut nappaatilinnik sullissinernik malitseqartinneqarnissaat. Tarnimikkut nappaatilinnik sullissinermut tunngatillugu Nuup avataani tarnimikkut napparsimasunik katsorsaarnermi immikkut pitsaanerulersitsisussat suliuniutit arlallit atuutilersinneqarsimapput. Immikkut taaneqassaaq ungasissumiit qarasaasiaq atorlugu tarnikkut nappaatilinnut neqeroorutip atuutilersinneqarnera, nuna tamakkerlugu IKT-imik iliuusissamit aningaasat atornerisigut, Naalakkersuisut patajaannerulersippaat.

Eqqorpoq, ”*Tarnimikkut nappaatilinnik sullissinermut tunngasut pillugit nassuiaat, 2010*”-ip, Inatsisartuni oqaluserineqartoq aamma ”*Kalaallit Nunaanni qarasaasiaq atorlugu tarnikkut nappaatilinnik sullissineq pillugu nassuiaat*”-ip kiisalu ”*Piviusunngortitsinissamut periusissatut siunnersuut*”-ip suliarineqarneranni napparsimasut toqqaannartumik ilaatinneqanngimmata. Taamaattorli napparsimasut isumaat suli pingaaruteqartorujussuuvoq. Nassuiaatini taaneqartuni napparsimasut toqqaannartumik ilaatinneqanngikkaluartut nassuiaatit suliarineqarput una taamaallaat siunertaralugu, napparsimasunik katsorsaaneq sapinngisamik pitsaanerpaamik qularnaarniarlugu aamma napparsimasut atugarisaat pitsaanerulersinniarlugit.

Anguniakkat tarnikkut nappaatilinnut sullissinermut tunngasut ”*Tarnimikkut nappaatilinnik sullissinermut tunngasut pillugit nassuiaat, 2010*”-mi allaaserineqartut suli anguneqanngillat. *Tarnimikkut nappaatilinnik sullissinermut tunngasut pillugit nassuiaat, 2010*”-mi inassuteqaatigineqartunut malitseqartitsinerit killiffiat” aamma 2013-2017-mi sulenerup nanginnissaanut pilersaarummut siunnerssuut” 2012-mi suliarineqarput. Pilersaarummi allaaserineqartut aallaavigalugit angusassamik toraagaqarluni Peqqinnissaqarfik sulivoq.

Piffissami matumani sakkukinnerusumik tarnikkut nappaatillit, tarnikkut nappaatillit eqqartuussaannermikkut inissinneqarsimasut aamma tarnikkut nappaatillit inuttut atugarissasigut sullissinnermi nappaammik suussusersiinerup katsorsaanerullu pitsaanerulersinnissaat pillugit peqqinnissaqarfik sulissuteqarpoq. Katsorsartinnermut aamma inooqatigiinnermi ajornartorsiutinut tunngatillugu, tarnikkut nappaatillit amerlasuut paasiuminaassinnaasumik pisariaqartitsisarput. Tarnikkut nappaatillit inuttut atugarisaannik sullissinnerup nukittorsarnissaanut tamanna pissutaasunut ilaavoq.

Naalackersuisut siunnersuuteqartoq ugguuna isumaqatigaat, katsorsaanermit sullissinnerit naliliiffigineqarnerini tamani qanoq ingerlasoqarnerisooq aamma ilaatigut katsorsaanerit inernerinik napparsimasup paasininnera ilaatigut aallaavigineqassasoq. Siunissami nalilersuinnermut atatillugu tarnikkut nappaatillit ilaatinneqartassapput aamma tamatigut qularnaarneqassaaq, suleriaatsit nutaat napparsimasut suleqatigalugit atuutilersinneqartassasut. Tarnimikkut nappaatillit nakorsiarneri pisariaqartitaannik aallaaveqarpoq. Naliliiviunerunngikkaluartunik piviusumik inooqatigiinnermi napparsimasumut avatangiisaasut akuttunngitsumik paasiuminaatsuusut aamma ulluinnarni napparsimasup pisariaqartitai ingerlaavartumik ukkatarineqarput.

Napparsimasut atugaasa pitsaanerulernissaat kissaatigalugit siunnersuut saqqummiunneqaraluartoq, ukiumoortumik katsorsaalluni suliniuteqarnermut nalilersuinnerit suliarinerinut isumalluutit ataatsimoortillugit tamakkiinnerusumik atorniarnatigit Naalackersuisuni isumaqarpugut. Tarnimikkut nappaatilinnik sullissinnermut tunngatillugu sulisunik ilinniarsimasunik Peqqinnissaqarfik amigaateqartorujussuuvoq. Piffissaq isumalluutillu, ukiumoortumik nalilersuinnermut atorneqartussat, katsorsaanermit namminermit taamaallaat tiguneqarsinnaapput. Taamalu napparsimasunik toqqaannartumik attaveqarnermut piffissakinneruneq allaffiullu saaniinnissamut piffissaqarneruneq siunnersuutip kingunerissavaa.

Ukiumoortumik nalilersuinnerit aningaasatigut killiliussat pioreersut iluanni pisinnaassanngillat, kisianni ilinniarnermut annertuumik suliniuteqarnermik aamma immikkut isumalluutinik pilersuinnermik piumasaqaateqassaaq, pitsaasumik nalilersuinnerit suliamut ilisimasaqarnermik pisariaqartitsipput soorlu nalilersuinnermut periutsinik, ullumikkut najukkani sulisutta piginngisaannik.

2013 – 2017-imi sulinerup nanginnissaanut pilersaarusiortoqarpoq, pilersaarutip naanerata kingorna tarnimikkut napparsimasut sullinneqarnerinut tunngasut atatsimoortillugit nalilersorneqassasut aamma sullitat attuumassutilittut taaneqartut kiisalu tassunga atatillugu katsorsaanermit sulisut immikkoortut ilaattut ataatsimoortumik naliliinnermi ilaatinneqassasut Naalackersuisut siunnersuutigaat.

Tamanna tunngavigalugu siunnersuutip itigartinneqarnissaa Naalackersuisut inassutigaat.

Naalackersuisut imaattumik allannguutissamik siunnersuuteqarput:

”2017-mi tarnimikkut nappaatilinnik sullissinermut tunngasunik ataatsimoortumik nalilersuineramik suliaqaqqullugit Naalakkersuisut peqquneqassasut. Sullitat attuumassutilittut taaneqartut katsorsaanermilu sulisut nalilersuineranut UKA 2017-mi Inatsisartunut saqqummiunneqartussamut ilaatinneqarnissaat qularnaarneqassaaq”.